

Mahisa tsghatá lwa Pwal ña la 2 La Tesalunik

Ga zgu

¹ Ii Pwal, kawadaga nda i Silas nda Timute, ta vinda na delewer na ña kaghuni Igliza Lazglafta ma luwa Tesalunik, kaghuni ta nzakway ka ña Da mu Lazglafta, nda Mghama mu Yesu Kristi ya. ² Ka nza zđakatahudi nda zđakwa i Da mu Lazglafta nda Yesu Kristi ta ghəña kaghuni.

Dza'a sasa Yesu da tsa guma

³ Zwanama da, had' ñni ta zlanja rfanaghatá Lazglafta ta ghəña kaghuni wa. Nda nza tsaya tđukwa, kabga ta dza'a ta kəma ta kəma zlgħay nda ñudufa ghuni, nda dvu ta dza'a ta kəma ta kəma ta magə inda kaghuni ña sanlaha ya. ⁴ Tsaya ta kəl ñni ka ghubakwa ñni ta ghəña kaghuni da sanlaha ma Igliza Lazglafta. Kaghuni ná, ñanaña kuni ta zlgħay nda ñuduf, ka su'a ghuya danwa nda giri ta gə lu ña ghuni.

⁵ Tsa ghuya danwa ya ta maray kazlay: Tudukwa guma Lazglafta kə'a, ña klaftani ta kaghuni ka gwal nda ra ña da ga mghama Lazglafta, ya ta ghuyə kuni ta danwa ta ghəñani ya. ⁶ Skwi tđukwa dza'a magata Lazglafta, na tsa ghuyanaptá danwa dza'a ghuyanapta tsi ta tsa gwal ta ghuyaghu-naptá danwa ya guli. ⁷ Ma zlagapta dza'a zlagapta Mgham Yesu Kristi ná, dza'a vlaghunavla ta mbi'a vgha ta kaghuni ta ghuytá danwa ya, nda anni tani. Ta luwa dza'a saha tsi kawadaga nda duhwalha

Lazglafta gwal nda mbra ya. ⁸ Ma takataka vu ta zlgħaku dza'a saha həŋ ɲa ghuzlanaptá iri ta gwal kul snantá Lazglafta*, ta kwalaghutá snatá Lfida Gwada Mghama mu Yesu Kristi ya. ⁹ Tsa ghuzla iri dza'a ghuzlanapta lu ta həŋ ya ná, tsaya zadanatá həŋ dza'a zadánata lu di'inj nda wa ira Mgham Yesu, nda glakwa mbrakwani† tani. ¹⁰ Ma sahani dza'a magakwa tsaya, ɲa zləzlvay inda gwal ta zlgħafta, ɲa ndərmimay inda tanj nda ndərmima. Tekw kaghuni mataba tanj, kabga zlgħafzlgħa kaghuni guli ta gwada ya mnaghuna ɲni.

¹¹ Tsaya ta kəl ɲni ka gdata ta maga du'a da Lazglafta ta ghəŋa ghuni, kada nzata kuni ka guram nda skwi ya hgaf tsi ta kaghuni, ka zlgħaftá kuni ya. Ka katá tsi ta kaghuni nda mbrakwani, ɲa magay ghuni ta skwi dínadina, nda ya ɲa yifanaf-tani ta zlgħay nda ɲudufa ghuni. ¹² Mantsa ya tama, dza'a mutsay hga Mghama mu Yesu Kristi ta glaku nda ma kaghuni, ɲa vlaghunatani guli ta glaku. Nda nza tsaya ka zɖakatahuda Lazglafta mu nda Mghama mu Yesu Kristi.

2

Skwi dza'a magaku ta saha Yesu

¹ Zwanama dá*, ta kumay ɲni ta mnaghunatá gwada ta fitika sagha dza'a sagha Mghama mu Yesu Kristi, nda gwada ta fitika tskavata dza'a tskavata mu ta kəmani ya. Wya skwi ta ndəbu ɲni ta dzvu da kaghuni: ² Ka mamu mndu ta

* **1:8** Grawa nda Isaya 66:15. † **1:9** Gray nda Isaya 2:10, 19, 21.

* **2:1** Gray nda 1 Tesalunik 4:15-17.

mnaghunata kazlay: Saghasa fitika sagha Mgham Yesu kə'a, yaha kuni da zləŋ ka ghuya ghəŋa ghuni. Dər má la anabi tsi, dər má snaŋ nda sna a kuni ta gwadəy, dər i'i a ta vindaghunafta ká lu má mnaghunata. ³ Yahayaha mndu da nanaftá kaghuni dər nda wati ma tsakalawi. Gi bəŋalaŋ a dza'a sagha tsa fitik ya wa. Makəf tsaya ná, nda ndəgha gwal dza'a gaftá sidi nda Lazglafta, ŋa saba tsa ghwadaka mndu ya dədəy ta daʒi. Tsatsi mndu ta nzakway ka ghuma. ⁴ Dza'a sli'avafslia ta ghəŋa inda skwi nda ghuʒa, nda ya ta ghəŋa inda skwi ta tsəlbú lu ta tsəlbú ta kəmani. Ŋa nzamtani ma həga Lazglafta, ŋa mnayni kazlay: I'i Lazglafta† kə'a. ⁵ Mnaghunamna yu ta inda tsa skwiha ya ma fitika nzakwa da da kaghuni. Zaghunapza ra? ⁶ Ndanana ná, nda sna kuni ta skwi ta ŋaghutá tsa ghwadak ya. Ka saghasa tsa fitikani ya ná, dza'a zlagapzlaga. ⁷ Aŋ mndani, nda ghada ta magakumagaku slnahani. Ma tsanaŋta tsa mndu ta ŋaghuta ya ta tvi dza'azlay ná, kdekdek a dza'a maga tsi ta slnani wa. ⁸ Dza'a sabsa ta daʒi. Ma sagha dza'a sagha‡ Mghama mu Yesu ma glakwani, ŋa zadənatani nda hafu dza'a vuslagapta tsi ma wani. ⁹ Nda mbrakwa halaway dza'a saba tsa ghwadaka mndu ya, ŋa magayni ta inda mazəməmha, nda inda skwi ya ta ndrakawu lu nda ndrakawa, nda inda mandərmimi ŋa nana§ mnduha. ¹⁰ Dza'a magay ta inda ghwadaka skwiha ŋa nanaghatá gwal ta zada ghəŋa taŋ, kabga kwalaghuta taŋ ta tsu'afta,

† 2:4 Gray nda Daniyel 11:36, Izekiyel 28:2. ‡ 2:8 Gray nda Isaya 11:4. § 2:9 Gray nda Mata 24:24.

dɔvaf a hən ta kahwathwata má dza'a mbanafá hən ya wa. ¹¹ Tsaya kəl Lazglafta ka ghunagatá mbrakwa zadaku ta ghəŋa tan ŋa zlglafta tan ta tsakalawi, ¹² kada tsanaghata Lazglafta ta guma ta inda tsa gwal ta kwalaghuta zlglaftá kahwathwata, zɔɔgana maga ghwadaka skwi ta hən ya.

Nzaku ka mnda zlglaftay nda ŋuduf nda diha

¹³ Anŋi, nda ra ka rfay ŋni ta Lazglafta ta ghəŋa kaghuni zwanama. Dvudva Mgham Yesu ta kaghuni kabga Lazglafta ta zbaptá kaghuni daga ta tanŋan, ŋa mbaghunafta nda ma slna Sulkum, ka faghutá kaghuni nda ghuá, ma zlglafta ghuni nda ŋudufa ghuni ta tsa kahwathwata ya. ¹⁴ ŋa tsaya kəl tsi ka hgaftá kaghuni nda ma Lfida Gwada ya mnaghuna ŋni, ŋa mutsafta ghuni guli ta glakwa hga Mghama mu Yesu Kristi. ¹⁵ Tsaya tama zwanama dá ná, dihavawa diha, ka ŋanata kuni ta inda tsa skwiha taghaghunaf ŋni ya, dər ya mnaghuna lu nda mna, dər ya vindaghunafta lu nda vinda a tsi.

¹⁶ Ta maga du'a yu da Mghama mu Yesu Kristi tsatsi ka ghəŋani, nda ya da Da mu Lazglafta ya ta dɔvutá amu, ya ta zɔɔntá hudi ka lóamatá ŋuduf ŋa kɔkɔkɔdzen, nda skwi faf mu ta ghəŋ tida. ¹⁷ Ka lóaghunatá tsi ta ŋuduf, ka vlaghunatá tsi ta mbrakwa gdata ta maga skwi dinadina ma slna nda ya ma gwada.

3

Magawa du'a ta ghəŋa anŋi

¹ Skwi ya ta pɔaku tama zwanama dá, magawa du'a ta ghəŋa anŋi, kada dza'a gwada Mgham Yesu

ta kəma ta kəma misimmisim, nda ya ɲa ghubaray mnduha manda ya ta magaku da kaghuni ya. ² Magawa du'a guli ta ghəɲa aɲni ɲa kataɲnatani da mnduha ta sidi, kabga inda mndu a ta tsu'a na gwada ta mnə ɲni na wa.

³ Mgham Yesu ná, vərda mndu ya, dza'a mbraghunafmbra, ɲa nghayni ta kaghuni da halaway*. ⁴ Wya skwi graf ɲni ta ghəɲa kaghuni ma ndi'atá vgha ɲni nda Mgham Yesu: Ta ɲanaɲa kuni ta hidaku ya ta vlaghunata ɲni, nda gdata ta gdata kuni ta magay nda ya dza'a kuni magay manda tsaya.

⁵ Ka maraghunamara Mgham Yesu ta tvi ɲa dɖvuta ghuni ta Lazglafta, nda ya ɲa hbay ghuni ta ɲuduf manda ɲa Kristi.

Maga slna manda va ɲa Pwal

⁶ Zwanama da, ma hga Mghama mu Yesu Kristi ta mna ɲni ta na gwada na ɲa ghuni, tsaghwa vgha tavata mnda zlghay nda ɲuduf ta yadi, kul had ta maga skwi taghaghunaf ɲni. ⁷ Kaghuni, nda sna kaghuni ta skwi ɲa magay, ɲa ksay ghuni ta sada ɲni. Ma nzakwa ɲni da kaghuni ná, nza a ɲni ka gwal ta yadi wa. ⁸ Zan a ɲni ta skwa zaya mndu ka mbalay wa. Aɲni ka ghəɲa ɲni ta slavapta nda rvidik tani, nda fitik tani ka maga slna ɲa zay ɲni, kabga va a ɲni ta ghuyaghunaptá danwa† ta ghəɲa skwa zay ɲni wa. ⁹ Nza a vəl magay ɲni mantsa ya kazlay, ra a ka mutsay ɲni ta skwi da kaghuni wu kə'a wa. Nda nza tsa slna magə ɲni ya ɲa tagha

* **3:3** Gray nda Mata 6:13, Yuhwana 17:15. † **3:8** Gray nda Slna gwal ghunay 20:34, 1 Tesalunik 2:9.

skwi ŋa ghuni. ¹⁰ Ma tsa fitika nzakwa ŋni da kaghuni ya ná, wya ka ŋni si ta mnaghunata: «Ka va a mndu ta maga slna ya wu ná, ma vlan̄ kuni ta skwa zay guli,» ka ŋni.

¹¹ Tsa nzakwani ya, snan̄naghasna kazlay mamu sanlaha ta yadi mataba ghuni, kul had̄ ta maga slna kə'a. Ta ghəŋa valu da kiwa ghatalakw yeya skwi ta magə həŋ. ¹² Skwi ta mnə ŋni ŋa tsa mnduha ya, nda hga Mgham Yesu Kristi na: Magawamaga ta slna nda tvani, ka mutsa kaghuni ka ghəŋa ghuni ta skwi ŋa zay ghuni, ka ŋni.

¹³ Kaghuni ya zwanama ná, ma hərfaku kuni ta maga skwi dīna. ¹⁴ Ka had̄ yu ta sna tsa gwada vindaf lu ya wu, ka mndu katsi, mnanaŋwa mnduha demdem, ka dgaghuta kuni ta vgha nda tsi, ŋa ksafatani ka hula. ¹⁵ Nziya nza tsi, yaha kuni da klaftá həŋ ka ghuma ghuni. Zlahawazlaha nda tvani, kabga zwanama ghuni ya.

¹⁶ Ka vlaghunavla Mgham Yesu tsatsi ka ghəŋani ta vla zdaku ya, ta zdaku dər ta wati luwa tsi. Ka nza Mgham Yesu kawadaga nda kaghuni demdem.

¹⁷ I'i Pwal ta vindaghunafta nda dzva da, ta ga zgu yu ŋa ghuni. Tsaya thatá dzva da ta inda delewerha ta vindafta yu. Mantsa ya ta vinda yu.

¹⁸ Ka nza zdakatahuda Mghama mu Yesu Kristi kawadaga nda kaghuni demdem!

Deftera Lfida Dzratawi New Testament in Hdi

copyright © 2013 Wycliffe Bible Translators, Inc.

Language: Hdi

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Hdi

© 2013, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files
dated 29 Jan 2022

f257b780-c0dd-5cce-9b20-430484439898